

Kusala Ntete Mambu me Luta Mfunu

Disongidila ya 'Kusala Ntete Mambu me Luta Mfunu' : Kuvanda na mpila kuzikisa to kusola nki me luta mfunu, na mpila nde, mambu ya me luta mfunu kusalama ntete, ti bima ya kele mfunu mingi ve, yo vanda ve na mpila kukatula bima ya mfunu na luzingu na beto.

Histoire ya Bible: Katuka na Kuwakana ya Ntama, na mukanda ya Agai. Mutubi ya Nzambi zina ya Agai, yandi songa bantu kutunga diaka nzo ya Nzambi ya me fwaka.

Kusala bima ya ta sadisa malongi: Tunga saki ya lele. Zenga mabulu na nsi na yo. Nata mbongo ya kibende kana yo ikele, to matadi ya nene ya lenda basika na kati ya mabulu na nsi ya saki. (Matadi yina ta monika bonso bibende ya mbongo.) Sadila visuel yai ntangu nge ke longa Agai 1 :6.

Verse ya kulonguka :

Matayo 6 :33

Kansi beno landa kaka na kusosa Kimfumu ya Yandi (Nzambi) ti mambu yina ya Yandi ke zolaka, ebuna Yandi ta yika beno bima yina yonso.

[Bageste sambu na verse :

Beno landa kaka (bageste bonso "tambula" na maboko)

kusosa (tula maboko na Iweka ya meso, ti tala na droite ti na gauche bonso kusosa kima)

Kimfumu ya Yandi Nzambi (songa diboko na zulu)

mambu ya Yandi ke zolaka (tula maboko na zulu ya ntima)

Yandi ta yika beno (maboko na zulu, na nima, maboko na muntu ya nkaka bonso kupesa yandi kima)

bima yina yonso (Sala cercle na maboko)

Bandinga ya verse yai, bo me tula yo na nkunga. Nkunga yina kele na mukanda ya MCE, "Bankunga ya Ecodim." Kana nge zaba yo, nge lenda yimba yo ti bana.

Kukantika Leso :

Docteur songaka Kwame nde yandi vandaka na maladi mosi ya ngolo, ti mpila kusansa maladi yina, yo vandaka ve. Yandi fweti kufwa, mbala ya nkaka na kati ya bangonda sambanu. Kwame yantikaka kusamba Nzambi nde yandi beluka, kansi yo salamaka ve. Ntangu yandi vandaka kusamba, Nzambi songaka yandi ve nde, « Nge ta beluka,» kansi Nzambi katulaka boma yonso. Yandi pesaka Kwame ngemba ya nene na ntima na yandi.

Na nima ya ntangu, docteur songaka Kwame nde, maladi me kwenda kaka. Yandi monaka bonso kaka kiteso ya bangonda tatu me bikala na moyo na yandi. Ntangu Kwame vutukaka na nzo, yandi bakaka papier ti biki. Yandi yantikaka kusonika. Nki yandi zolaka kusala na bangonda iya ya me bikala na yandi ? Nki me luta mfunu ? Kwame sonikaka mambu yonso yandi zolaka kusala na ntwala Nzambi ta baka moyo na yandi.

Na nima ya kusonika mambu yina yonso, yandi yantikaka kusonika banombre na ntwala ya konso mambu. Yandi sambaka mingi na zulu na yo. Na kati ya mambu yai, nki me luta mfunu ? Yandi tulaka 1,2,to 3 na ntwala na konso mambu. Ndambu mambu, yandi katulaka yo na papier yina. Na nima ya kusamba, yandi monaka nde mambu yina vandaka mfunu mingi ve, bonso yina ya nkaka. Na nsuka, Kwame yantikaka kusala bamambu ya vandaka na liste na yandi.

Bu Kwame yantikaka kusala bamambu ya yandi me sonika, keti nge banza yandi yantikaka na bamambu yandi katulaka na papier ? Ikele ve. Keti yandi yantikaka na bamambu ya yandi tulaka no. 3 ? Ikele ve. Sambu na nki ? *[Longi, pesa bana ntangu kupesa mvutu.]*

Ikele ve, sambu No. 3 vandaka ve mambu ya me luta mfunu. Nki Kwame vandaka kusala ? Yandi vandaka kusala mambu mosi ya mayele—kuzikisa nki mambu ya me luta mfunu, ebuna kusala yo ntete. Na français beto tuba "prioritiser," to kuzenga mambu ya me luta mfunu. Yandi zolaka kusadila ntangu na yandi na mambu ya me luta mfunu.

Transitio na leso ya Bible:

Keti mambu ya beto sola bonso mambu ya me luta mfunu, Nzambi ke tala yo ? Ee. Matayo 6:33 ke songa beto nde beto fweti sosa NTETE kimfumu ti lunungu na Yandi, ebuna mambu yonso ya nkaka ta landa. Nzambi ta yika beto yo. Na verse yina, Nzambi ke lomba beto bantu na Yandi kusola, ti kusala ntete mambu ya me luta mfunu—mambu ya kimfumu na Yandi. Yai kele mambu ya ta vila ve, kansi yo ta zinga mvula na mvula. Yandi ke songa beto nde, ntangu beto zenga nki me luta mfunu, konso ntangu Yandi fweti vanda No. 1. Yandi fweti vanda ntete na luzingu na beto.

Bubuyai beto ta baka leso na beto na mukanda mosi ya fioti ya kele na Kuwakana ya Ntama. Zina ya mukanda, Agai. Mukanda yai ke songa ntangu ya Nzambi pesaka ndola na bantu ya Israel, sambu bo tulaka ve Nzambi ntete to nene na luzingu na bo.

Kuzaba ndambu sambu na mukanda ya Agai : Mukanda Agai kele penepene na nsuka ya Kuwakana ya Ntama. Mikanda ya nsuka ya Kuwakana ya Ntama ikele (bana tuba na mpila ritimika) : **Sofonia, Agai ; Zakaria, Malashi.**

[Moniteur, kana bana kele na Bible, songa bo nki mutindu kumona 'Mambu kele na Mukanda Yai' na luyantiku ya Bible, bo mona mukanda ya Agai kele na nki dititi, ebuna bo kangula Bible na sika yina kumona yo.]

Mukanda Agai kele zina ya mutubi ya Nzambi ke tuba na kati ya mukanda. Yo kele na bakapu kaka zole. Kaka mukanda ya Yude na Kuwakana ya Mpa me luta yo na nkufi.

Kansi, Agai kele na dibanza mosi ya nene. Yo ke songa nki mambu ya mbi lenda kwisila bantu kana bo sala ve ntete, mambu ya me luta mfunu. Yo ke songa mambu ya kitoko ya lenda salama ntangu ya beto yantika kusala ntete mambu ya me luta mfunu. Beto tala nki mukanda yai Agai lenda longa beto.

Malongi ya Nene ya Leso na Bandambu 5, ti mpila ya bana lenda sala na yo :

NB kutanga na bana: Muntu Agai vandaka mutuba ya Nzambi—profete. Yandi waka ndinga ya Nzambi, ebuna yandi songaka yo na bantu ya nkaka. Yandi zingaka na Yuda, kiteso ya bamvula 400 na ntwala ya Yesu. Bamvula 70 na ntwala ya yandi, Nzambi pesaka nzila na bambeni kukota bwala Yeruzalemi. Yandi kangulaka bo nzila na kufwa bwala Yeruzalemi, ti ata Tempelo ya kitoko, sika bantu sambaka Nzambi. Bantu ya Yuda kumaka bampika na nsi ya nkaka. Nzambi kangulaka bambeni nzila kusala mpidina sambu bantu ya Yuda me landa kaka kulemfuka ve na Nzambi. Bo me landa kaka kusamba biteki. Bo waka ve baprofete ya Nzambi tindilaka bo. Na ntangu ya Profete Agai, Nzambi me kangula nzila na Bayuda kuvutuka na Yeruzalemi kutunga diaka yonso ya bambeni na bo me fwaka.

Kisalu yantikaka mbote. Bo tungaka ntete mesa ya nkailu sambu na kusamba Nzambi. Na nima, bo yantikaka kutunga banzo na bo. Nzambi me songaka bo kutunga diaka nzo-Nzambi, kansi bo vandaka kusala bima mingi ya nkaka. Ebuna bo tubaka nde bo vandaka na ntangu ve kutunga nzo-Nzambi. Ntangu yina, Nzambi tubaka ya Agai sambu na mambu yina.

1. Nzambi songaka Agai nde bantu vandaka ve kusala mambu ya me luta mfunu (Agai 1:1-5).

▣ **Tanga Agai 1:2-3** malembe-malembe, ti na expresio.

[Moniteur, kana bana ke na niveau ya zulu, nge lenda tala mwana ya classe na ntwala, ti lomba yandi kutanga yo. Kana nge sala mpidina, mwana fweti sala pratike na ntwala, ti yandi fweti tula papier to kidimbu na verse yina sambu na kumona yo nswalu.]

2-3 Mfumu Nzambi, Nzambi-Mpungu, tubaka na munoko ya profete Agai nde:
"Bantu yai ke tuba nde ntangu ya kutunga diaka Nzo-Nzambi me lunga ntete ve."

? Yula bana : *[Moniteur, binga nswalu zina ya mwana ya fweti pesa mvutu, kukonda kuyindula mingi to kusadila ntangu mingi.]*

- Nani ke tuba na verse yai ?
(Nzambi ke tuba.)
- Nzambi tubaka na nki profete ?
(Na profete Agai.)
- Bantu vandaka kutuba nki, ata na ndinga, ata na nsi ya ntima ?
(Ntangu me lunga ntete ve kutunga nzo-Nzambi.)
- Nki mutindu Nzambi zabaka kutuba to mabanza na bo ?
(Nzambi ke zaba mambu yonso.)
- Bantu yai me yutuka na Yeruzalemi sambu na kutunga diaka. Ebuna, sambu na nki beno banza nde bo yindulaka nde, ntangu me lunga ntete ve kutunga diaka nzo-Nzambi ?
(Bo monaka mambu ya nkaka bonso kuluta mfunu.)

☺ **Kuyimba**

[Moniteur, kabisa bana na bandambu zole. Ndambu ya ntete telama, ti bo yimba na mpila mosi ritimika : "Nzambi waka bantu tuba... » Bo vanda.

Nswalu ndambu ya zole ya bana telama ti bo yimba : "Ntangu me lunga ntete ve."

Bandambu yonso zole telama ti yimba, "Kutunga diaka nzo-Nzambi."
Sala mpidina mbala 3 to 4.]



Tanga Agai 1 :4-5.

4 Sambu na nki beno bantu na Mono, beno ke lala kaka na banzo ya kitoko kansi nzo na mono kele kaka ya kufwa ?

5 Beno yindula fioti mambu yai me bwila beno.

❓ **Yula bana :**

- Sambu na nki Nzambi ndimaka ve mpila bantu tubaka nde, ntangu me lunga ve kutunga nzo-Nzambi ?
[Moniteur, songa bana nde yo tadilaka nki mambu bo monaka kuluta mfunu. Yo monaka yo mfunu kutunga banzo ya mbote

sambu na bo mosi, kansi nzo-Nzambi, bo monaka yo mfunu mingi ve. Yai songaka mpi nde bo monaka Nzambi Yandi mosi mfunu mingi ve na luzingu na bo. Bo monaka yo kuluta mfunu nde bo mosi kuvanda mbote na banzo na bo.]

☺ **Kuyimba :**

Bana lenda tuba, to yimba na mpila ritimika : *[Moniteur, bisono ya kele kusonika ngolo bonso yai, bo fweti tuba ngolo ti nda.]*

"**Nki** me luta **mfunu** ? --**Nki Nzambi** zola, to nki **mono** zola? (Tuba to yima yo mbala mingi.)

Na nima, yika yai:

Mambu ya luta **mfunu** ke priorite na **mono** !

►!◀ **Kubambuka diaka dilongi ya ntete.**

Nzambi songaka profete Agai kusonga bantu ya Yuda nde Yandi vandaka ve kiese na bo, sambu bo monaka nde kutunga banzo na bo mosi me luta mfunu, kansi makambo ya Nzambi, bo monaka yo mfunu mingi ve. Mabanza ya ntima na bo, yo monikaka na mpila bo kondaka kutunga diaka nzo ya Nzambi.

2. Nzambi ndimaka ve mambu ya bo monaka mfunu. Yo yina, mambu ya mbi landaka. (Agai 1:6, 11).

📖 **Tanga Agai 1:6.** *[Kinga fioti na nima ya konso kitini sambu bantu yindula yo.]*

6 Beno kunaka bima mingi na bilanga kansi beno me katula kaka ndambu.

Beno ke na madia kansi yo lunga beno ve.

Beno ke na vinu ya kunwa kansi yo me kuka ve na kukanga beno.

Beno ke na bilele ya kulwata kansi yo me kuka ve na kukatula beno madidi.

Muntu yina ke sala ke baka ve mbongo ya kufwana sambu na kuzinga mbote.

? Yula bana:

Mono ta yantika kutuba frase mosi, ebuna beno manisa yo.

- Bo kunaka nkeni mingi na bilanga, kansi bo katulaka _____. (fioti)
- Bo kudiaka, kansi bo waka kaka _____. (nzala)
- Bo kunwaka, kansi bo waka kaka _____. (nzala)
- Bo lwataka bilele, kansi yo katulaka ve _____. (madidi)
- Bo salaka kisalu, kansi salaire, bo tulaka yo na saki fuluka na _____. (mabulu).

Kusonga nki me salama :

Lomba bavoloniers 5 kutelama. Sala bageste bonso nge ke pesa mwana mosi bankeni mingi na maboko na yandi. Yandi ta sala bageste bonso yandi ke kuna yo.

Ntangu yandi ke kuna yo, yandi ta tuba mingi bonso yandi ta zwa bambuma mingi na bilanga na yandi. Na nima, yandi vutuka na bilanga, kansi yandi mona kaka bima zole ya fioti.

Mwana ya zole ta sala bageste bonso yandi ke na nzala. Nge sala geste bonso nge ke pesa yandi kitini ya madia, kansi yo lunga ve. Yandi kudia yo, kansi yandi bikala kaka na nzala.

Mwana ya tatu ta sala bageste bonso yandi ke na nzala ya kunwa. Nge sala geste bonso nge ke pesa yandi masa. Yandi kunwa yo, kansi yandi ke bikaka nzala.

Mwana ya iya ta sala bageste bonso yandi kele madidi. Nge sala geste bonso nge ke pesa yandi lele. Yandi lwata yo, kansi yandi bikaka kaka madidi.

Pesa mwana ya tanu saki (ya nge me yidika na ntwala) ya kele na mabulu na nsi yo. Yandi sala ngolo na kisalu na yandi. Yandi baka ndambu bibende ya mbongo (to matadi) sambu na kisalu. Yandi tula yo na kati ya saki, kansi ntangu yandi ke tambula na nzila, ko kubwa. *****



Tanga Agai 1:11.

11 Mono me yumisa bima yonso na zulu ya ntoto, na bangumba, na bilanga yonso ya ble, ya vinu ti ya baolive ; Mono me yumisa konso kima ya ntoto me basisaka. Bantu ti bambisi me mona mpasi, ebuna kisalu ya beno yonso me beba. Mono Mfumu Nzambi, Nzambi-Mpungu, Muntu me tuba. »

❓ Yula bana :

- Nzambi tubaka nde Yandi salaka nki sambu na bo?
(Yandi yumisaka ntoto na bo.)
- Yandi yumisaka nki na bo?
(Ntoto, banguma, Bilanga ya ble, bavinu, baolive, ti konso kima ya basika na ntoto)
- Ntangu Nzambi salaka mpidina, Yandi zolaka kutwadisa mabanza na bo na kuyindula nki?
(Sambu bo yindula nki bo me tula ntete na luzingu na bo. Yo vandaka kusadisa bo ve.)

☺ Yimba:

Yimba na mpila ritimika: Bula maboko sika X ikele.

**Kulanda mambu ya mfunu mingi ve
Ke twadisa beto na nzila ya mpasi !** (Yimba mbala iya.)

►!◀ Kubambuka diaka dilongi ya 2

Nzambi zolaka bantu na Yandi Bayuda, kansi bo vandaka kukwenda na nzila ya mbi, sambu bo vandaka ve kumona mambu ya Nzambi bonso mambu kuluta mfunu. Yandi vandaka na mfunu kusala bo Atasio! Bo vandaka kumona mambote ti kitoko na bo mosi mambu ya luta mfunu. Yai vandaka mbote ve sambu na bantu ya Nzambi. Mpila bo salaka, yo vandaka kutwadisa bo na nzila ya kiese ve.

Nzambi sadilaka Profeti Agai sambu na kusonga bo nki bo fweti mona kuluta mfunu. (Agai 1:7-10).

 **Tanga Agai 1:7.** [Ee, beto ke vutuka na nima na texte. Probleme ikele ve.]

7 Mono ke yula beno diaka nde keti beno me zaba ve sambu na nki mambu yai me bwila beno?

? Yula bana:

- Nzambi zola bo kuyindula nki?
(Sambu na nki bima yina ya mbi me bwila bo.)

 **Tanga Agai 1:8.**

*8 Ntangu yai beno tombuka na bangumba, beno kwenda kusosa mabaya.
Beno kwisa kutunga diaka Nzo-Nzambi, mpidina Mono ta vanda kiese,
bantu mpi ta pesa mono lukumu. Mono Mfumu Nzambi, Nzambi-Mpungu,
muntu me tuba.*

? Yula bana:

- Nzambi songaka bo pwelele kusala nki ?
(Kukwenda kusosa mabaya, kutunga diaka Nzo-Nzambi.)
- Ntangu bo tunga diaka nzo-Nzambi, Nzambi ta vanda nki mutindu ?
(Yandi ta vanda kiese.)
- Sambu na nki bo fweti tombuka na bangumba?
(Sambu mabaya vandaka kuna sambu na kutunga nzo-Nzambi.)
- Kana beto zolaka kutunga nzo-Nzambi bubuyai na sika yai, beto ta kwenda wapi?
[Moniteur, bana ta songa nki kele mfunu kutunga nzo sika bo ikele, ti bantu ke kwenda wapi kusosa bima yina.]
- Yai ke songa nde beto bantu ya Nzambi, beto lenda sala mambu ya ta pesa Nzambi kiese, plaisir, lukumu. Nge mona yai nki mutindu?
Sambu na nki?

(Kiese. Yo pesa beto kikesa sambu beto lenda sala mambu ya mfunu na meso ya Nzambi.)

Kusonga nki me salama

Bana yonso na kimvuka sala bageste kusonga mambu yai: Kutombuka na ngumba, kusosa mabaya, kuzenga yo, kunata yo na sika ya bo ta tunga, kutunga nzo-Nzambi.

►!◀ Kubambuka diaka nki beto me longuka na dilonga ya 3.

Nzambi vandaka na kiese ve na bantu na Yandi Bayuda, kansi Yandi bikaka bo ve mpamba, kuyindula kana nki makambo vandaka. Bo vandaka kusala ve mambu ya me luta mfunu. Bo vandaka na mfunu kuyindula nki me luta mfunu, kutula Nzambi ntete na luzingu na bo. Bo vandaka na mfunu ya kusonga nde Yandi me luta mfunu na mpila bo ta sosa mabaya ti kutunga diaka nzo ya bisambu.

2. Ntangu bo salaka ntete mambu ya luta mfunu, Nzambi kitulaka lusilu, yo kitukaka balusakumunu. (Agai 1:12-13 & 2:19).

[Moniteur, tanga somere yai ya malongi kaka.]

- Bantu lemfukaka na ndinga ya Nzambi ya Yandi songaka bo na munoko ya Profete Agai.
- Yo yina, Nzambi songaka bo nde Yandi vandaka sikamosi ti bo.
- Nzambi silaka nde yantika na lumbu ya bo lemfukaka, Yandi ta sakumuna bo.

►!◀ Kubambuka diaka malongi ya beto me mona na dilongi ya 4:

Nzambi me tindila bo bampasi mutindu na mutindu bonso 'Atasio !', yonso kubenda bo kusala ntete mambu me luta mfunu. Bu bo waka ndinga na Yandi, ti bo yantikaka kutula Yandi bonso mambu ya luta mfunu, Yandi yantikaka nswalu kusakumuna bo diaka. Bo songaka nde Nzambi me luta mfunu na mpila bo salaka mambu ya Nzambi tindaka bo kuna kusala—kutunga diaka nzo-Nzambi ya bambeni me fwaka.

3. Nzambi songaka bo nde bo vandaka kusala mambu ya mfunu na lukanu ya nene na Yandi sambu na nsi-ntoto yai (Agai 2:3-9).

Tanga Agai 2 :3.

2:3 “Ke na muntu awa na kati na beno lenda zaba diaka mutindu Nzo-Nzambi vandaka lukumu ntete ? Ntangu yai nki mutindu beno ke mona yo ? Keti yo ke monika ve bonso kima ya mpamba na meso na beno?

? Yula bana :

- Nani na kati na bo bambukaka lukumu ya bambeni yina me fwaka ? (Bamvula kuluta 70 me luta na nima bambeni fwaka nzo ya bisambu yina. Yo yina, kaka bambuta ya kununa ngolo na kati na bo, bo bantu ta bambuka lukumu na yo.)
- Kana beto yindula kaka lukumu ya kitoko ya Nzo-Nzambi ya nene ya vandaka ntete—yina ya Ntinu Solomon tungaka, keti nzo yai lenda vanda kitoko bonso yo? (Ikele ve. Yo ta monika kima ya mpamba kana bo bambuka lukumu ya nzo yina.)

Tanga somere yai ya malongi ya 2:4-5.

Ata nzo kuvanda ve bonso yina ya Solomon tungaka, Nzambi songaka bo kuvanda ngolo, kuvanda na boma ve, sambu Yandi silaka nde Yandi ta vanda sikamosi ti bo, kaka bonso Yandi vandaka ti bo ntama, ntangu Yandi twadisa bambuta na bo kukatuka na kimpika na nsi ya Ezipre.

Tanga somere yai ya malongi ya 2:6-9.

- Nzambi tubaka ntangu ta kwisa nde Yandi na nikisa zulu, ntoto, ti nzadi-mungwa. Yai ta songa nde mambu ya nene ta salama.
- Ntangu yina, Mesia ta kwisa. Agai monaka Mesia bonso 'Yandi yina ya bansi yonso me zola, Yandi ta kwisa.' (En français: "l'objet du désir de toutes les nations viendra (Traduction Darby). Yai vandaka titre mosi ya

kitoko ya songaka nde Mesia ta kwisa—kaka sambu na Bayuda kaka ve, kansi kuvanda Mvulusi ya bantu ya bansi yonso.

- Nzambi silaka nde Yandi mosi ta fulusa nzo yina na lukumu.
- Nzambi silaka nde na sika yina, Yandi ta pesa ngemba.
- Yandi vandaka kusila kukwisa ya Mfumu na beto Yesu Kristo, kiteso ya bamvula 400 na ntwala Nzambi tindaka Yandi na nsi-ntoto yai sambu na kuvanda Mvulusi na beto.
- Nki ta salama ya ta sala nde nzo-Nzambi yai kuvanda special mutindu yina ? Nki ta salama ya ta sala nde yo vanda kuluta nene tii yina ya ntete?
[Moniteur, kana ntangu kulunga, nge lenda yula bana nki bo zaba ya ke tadila Yesu ti tempelo to nzo-Nzambi ya Bayuda. Kana ntangu kele fioti, kaka tangila bo somere yai:]

 - Na kati ya nzo-Nzambi yai, bibuti ya Yesu Kristo ta songa Yandi na ntwala ya Tata Nzambi, ntangu Yandi vandaka kaka mwana ya fioti. Ntangu nganga-Nzambi Simeoni ta mona Yandi kuna, yandi ta tuba nde, “mono me mona, na meso na mono mosi, Ngulusi yina ya Nge me sola. .” (Luka 2: 30-31).
 - Na kati ya nzo-Nzambi yai, Yesu ta longa bambuta ya zabaka Bible mingi, ntangu Yandi me lungisa kaka bamvula 12.
 - Na kati ya nzo-Nzambi yai, Yesu ta telama na kati ya nkinsi ya konso mvula, ti Yandi ta tuba nde, “Malongi yai ya Mono ke pesaka beno kele ya Mono ve, kansi yo ke katukaka na Muntu yina tindaka Mono” (Yoane 7:16)
 - Na kati ya nzo-Nzambi yai, Yesu balulaka mesa ya bantu ya vandaka kuteka bima na kati na yo. (Matayo 21:12).
 - Yai kele nzo-Nzambi sika Yesu kotaka bonso Mfumu na zulu ya mpunda, ti bana mingi vandaka kumisa Yandi (Matayo 21:16).

- Kuluta mfunu, yai vandaka nzo-Nzambi sika Nzambi Tata pasulaka rido ya vandaka kukanga bantu nzila kukota na ntwala ya Nzambi. Ntangu Yesu fwaka, Nzambi pasulaka yo yantika na zulu tii na nsi, sambu na kusonga nde nkailu ya Yesu pesaka na zulu ya kulunsi, yo kangulaka nzila nde beto bakwikidi kwisa na Yandi na kikesa (Matayo 27:51).

►!◀ Bambuka diaka dilongi ya 5.

Na ntangu ya Agai, bantu ya Bayuda me konda kutunga diaka nzo-Nzambi kaka sambu bo me fulusa mabanza ti luzingu na bo na mambu ya nkaka. Ebuna bo salaka ve mambu me luta mfunu. Kansi, mambu ya Nzambi lombaka bo kusala, yo vandaka mfunu mingi na lukanu ya Nzambi kugulusa bantu ya ntoto ya mvimba. Nzambi pesaka bo privilege kutunga diaka nzo-Nzambi sika Yesu Mesia, Mwana ya Nzambi, ta tambula, mpi ta longa ! Bo ta mona yo ve na moyo na bo, sambu yo ta kwisa kusalama kaka na nima ya bamvula 400, kansi Nzambi zabaka yo. Yo vandaka na lukanu na Yandi.

Bu bo tulaka luzolo ya Nzambi bonso mambu kuluta mfunu na luzingu na bo, Nzambi zolaka kukangula bo nzila kuvanda parti ya mambu ya nene—lukanu na Yandi.

Mpila bo salaka ntete, yo zolaka kukanga bo nzila kusala mambu mosi ya nene, kaka sambu bo vandaka kumona mambote na bo mosi mfunu kuluta Nzambi ti lukanu na Yandi ! Kiese na kiese nde bo balulaka nzila na bo !

Malungi sambu na bana ya me guluka dezia :

Nani zaba nki mambu ya nene Nzambi lenda kangula nge nzila kusala na lukanu ya nene na Yandi ? Yandi kele na bima ya mbote ke kinga beto yonso ya zola Yandi.

Nki me luta mfunu na luzingu ya nge ? Nzambi kele wapi na kati ya mambu ya nge mona mfunu ? Keti Yandi kele ntete, No.1, to keti Yandi kele 3eme, to 787eme ? Nki mambu ya nkaka mpi kele mfunu na luzingu na nge ?

Nki bampila nge sadila ntangu mingi, kansi yina ya nge ke sala kieleka kele mfunu mingi ve ? Na nima ya Nzambi, nani bantu na luzingu ya nge, nge fweti mona bo

kuluta mfunu ? Keti kisalu ya nzo-nkanda, kulonguka, ikele mfunu na lizingu na nge ? Keti nge banza nde lumbu mosi, nge ya yindula, "Ah, kana mono monaka yo kuluta mfunu kulonguka !"

Keti nge ta samba na nsi ya ntima sesepiyai, kulomba Nzambi kusonga nge nki mutindu nge fweti balula to yidika mambu ya nge ke mona mfunu ?

[Moniteur, pesa bana nzila kusamba na nsi ya ntima. Na nima, kanga bisambu yina. Lomba Nzambi kusadisa bana kusala ntete mambu ya me luta mfunu na lizingu na bo.]

Devoir sambu na bana bakristo :

Kana nge kele mukristo, devoir mono ke pesa beno, yo yai : Na mposo yai, sosa kutula Nzambi ntete, ti sosa kusala konso lumbu mambu ya me luta mfunu.

Kusala sikamosi sambu na kukanga malongi :

Tuba sikamosi na mpila ritimika :

(français)—Pri, pri, pri, pri-**or**-i-tés! (Kutuba mbala iya.)

(Kituba)—Saala ntete, saala ntete,
Mambu ya me luta mfuuuuunu ! (Kutuba mbala iya)

Kubinga mwana ya me kwisa na Yesu ntete ve :

Nsiku ya ntete ya Nzambi ikele nde, Yandi fweti luta mfunu na lizingu na beto. Kana beto tuba kieleka, beto yonso me beba na mambu yina. Ata mosi ve na kati na beto lenda tuba nde konso lumbu, beto me tula Nzambi ntete. Mpidina? Ee, yo kele kieleka. Yo kele bonso Bible tuba, "Ata muntu mosi ve ke salaka mambu yina ya Nzambi ke zolaka...Bantu yonso me salaka masumu, bo ke na lukumu ya Nzambi mpi ve..." (Roma 3:10, 23). Ata muntu mosi ve na kati na beto ke sala na mpila ya mbote, ata nsiku ya ntete ya Yandi pesaka. Yo yina, Nzambi tindilaka beto Mwana na Yandi ya kitoko, kukonda masumu, ya me katuka na zulu.

Yesu salaka yina ya pesaka Tata Nzambi kiese. Yandi lemfukaka na bansiku yonso ya Nzambi. Konso ntangu, Yandi monaka Tata Nzambi kuluta mfunu. Yandi kudipesaka moyo na Yandi na zulu ya kulunsi bonso nkailu, bonso mfuka ya Nzambi lombaka sambu na masumu na beto.

Nzambi songaka nde Yandi ndimaka nkailu yina ntangu Yandi tedimisaka Yesu na lufwa. Yesu kele na moyo bubuyai. Ntangu nge me yilama, nge lenda binga Yandi ti lomba Yandi kugulusa nge. Kaka songa Yandi nde, nge ke lomba pardo sambu na masumu na nge, et nge kwikila Yandi.

Yo vandaka lumbu mosi ya kiese ntangu mono kwisaka na Yesu. Mono ke samba nde nge ta kwisa na Yandi, mpi.

[Moniteur, kana nge mono yo mbote na sika nge ikele, nge lenda pesa encouragement na bo ya me zenga kulanda Yesu sambu na malongi yai, nde bo sonika zina na bo na zulu ya kitini ya papier ti bandinga yai : « Mono bakaka Yesu ! » ebuna bo pesa yo na nge ata konso ntangu ya bo mona nge.]

Manisa na bankunga ya kwenda nzila mosi na leso yai:

Sala mambu ya me luta mfuunu---nteete ! nteete !

Sala mambu ya me luta mfuunu---nteete ! nteete !

Mambu ya mfunu ta salama kaka

[Tuba] Kana nge—

Sala mambu ya me luta mfuunu---nteete ! ntete !

Sala mambu ya me luta mfuunu---nteete ! ntete !

Sala mambu ya me luta mfuunu [tuba ngolo] NTETE !

Nkunga ya nsuka :

Sosa Ntete Kimfumu ya Zulu

####